

Broj: 01-02-3-798/17

Sarajevo, 05.04.2017. godine

Z A P I S N I K
20. REDOVNE SJEDNICE PREDSTAVNIČKOG DOMA PARLAMENTA FEDERACIJE
BIH, održane 25. i 26.04.2017. godine

Sjednica je počela u 10.29.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Damir Mašić, Mujo Hasić, Enver Bijedić, Elma Đogić i Darijana Katić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici 15., 16. i 17. redovne sjednice usvojeni su bez primjedbi.

Prešlo se na izjašnjavanje o predloženim inicijativama.

Mahir Mešalić pokrenuo je inicijativu za prijenos sjednica Predstavničkog doma Parlamenta Federacije BiH putem Javnog servisa FTV a koja pojedinačnim izjašnjavanjem nije usvojena (44 glasa za, devet glasova protiv i 17 uzdržanih glasova).

Anela Šestić-Begović pokrenula je inicijativu.

Sa 61 glasom za, uz jedan glas protiv i uz četiri uzdržana glasa, usvojena je sljedeća:

I N I C I J A T I V A

Za izmjenu i dopunu Zakona o radu Federacije BiH.

U članu 69. Zakona o radu Federacije BiH dodati stav 4. koji glasi: "Uvesti ostvarivanje prava na bolovanje jednog roditelja/staratelja (ako su oba u radnom odnosu) djece oboljele od malignih bolesti tokom dijagnostike i aktivnog liječenja, te za vrijeme korištenja bolovanja da imaju pravo na 100% zarade od plaće radi intenzivne njege i brige o djeci."

Jasmina Zubić pokrenula je inicijativu prema Vijeću ministara BiH za uspostavljanje kancelarije za nadzor i akreditaciju ovjerilaca, koja nije usvojena (36 glasova za, 13 glasova protiv i 17 uzdržanih glasova).

Nermin Nikšić pokrenuo je inicijativu za provođenje parlamentarnog nadzora nad zakonitošću rada Federalnog ministarstva unutrašnjih poslova i Federalne uprave policije, a koja pojedinačnim izjašnjavanjem nije usvojena (44 glasa za, osam glasova protiv i 19 uzdržanih glasova).

Safet Kešo predložio je zaključak kojim se zadužuje Vlada Federacije BiH da putem resornih ministarstava, koja imaju isključivu ili sa kantonima Federacije podijeljenu ustavnu nadležnost u relevantnim oblastima djelovanja, izvrši provjeru postojanja kolizija u zakonskim propisima kantonalnog i federalnog nivoa te definira plan programskih i operativnih mjera za otklanjanje takvog stanja sa potrebnim elementima, a koji na osnovu pojedinačnog izjašnjavanja nije usvojen (37 glasova za, pet glasova protiv i 26 uzdržanih glasova).

Bilsena Šahman pokrenula je inicijativu. Na osnovu pojedinačnog izjašnjavanja, sa 65 glasova za, uz četiri glasa protiv i uz dva uzdržana glasa, usvojena je sljedeća:

INICIJATIVA

kojom se zadužuje Vlada Federacije BiH, odnosno Federalno ministarstvo zdravstva da:

1. u roku 60 dana dostavi prijedlog modela prestrukturiranja zdravstva u Federacije BiH sa procjenom troškova i mogućim izvorima finansiranja u skladu sa Reformskom agendom i zaključkom Vlade FBiH broj 1510/15 od 05.11.2015. godine;
2. da u roku 30 dana formira stručno tijelo za praćenje potrošnje u sektoru zdravstva.

Zastupnička pitanja

Mahir Mešalić osvrnuo se na inicijativu koju je pokrenuo za proglašenjem 25. maja Danom žalosti u Federaciji BiH i koja je usvojena 20.04.2016. godine. Međutim, taj datum nije proglašen danom žalosti u Federaciji. Zbog toga, kazao je, bit će prinuđen uputiti inicijativu da se rukovodstvo Predstavničkog doma i premijer Fadil Novalić proglase personama non grata u Tuzli.

Prvo pitanje uputio je ministru poljoprivrede – tri godine se izvozi šest hiljada tona mesa godišnje, te se postavlja pitanje – od čega ako znamo da se u BiH ne tovi ni jedna trećina mesa. Kome se u Federaciji, odnosno kojim firmama daju poticaji za izvoz mesa i u kojem iznosu? Zbog čega je zabranjen izvoz u 2016. godini termički obrađenog mesa u Republiku Tursku ako se zna da je bilo odobreno dvije hiljade tona? Da li firma “Bajra” ima monopol na izvoz mesa? Koliko mesa uvozi Federacija BiH, odnosno BiH iz Holandije i Poljske u procentima i tonama?

Sanel Razić pitanje je uputio Federalnom ministarstvu finansija, te Poreznoj upravi Federacije u vezi sa primjenom Zakona o finansijskom poslovanju koje je Predstavnički dom usvojio 22.06.2016. godine a njegova primjena je počela 01.01.2017. godine – koliko je za prvi kvartal 2017. godine izvršeno inspekcijskih nadozora, kako od porezne uprave tako i budžetske inspekcije nad primjenom odredbi ovog zakona.

Drugo pitanje postavio je Federalnom ministarstvu prometa i komunikacija, odnosno JP Ceste Federacije BiH – traži podatak za 2015. i 2016. godinu u smislu planiranih i utrošenih sredstava na ime ljetnog i zimskog održavanja magistralnih cesta, traži da mu se dostave zaključeni ugovori po konkretnim dionicama i sa subjektima koji su vršili to održavanje po pojedinim dionicama i po godinama.

Ajša Čenanović pitanje je uputila Federalnom ministarstvu zdravstva od kojeg traži informaciju u kojim kantonima se Odluka o maksimalnim iznosima neposrednog učešća osiguranih lica u troškovima korištenja pojedinih vidova zdravstvene zaštite u osnovnom paketu zdravstvenih prava ne provodi ili djelimično provodi.

Uputila je inicijativu prema Vladi Federacije BiH i Federalnom ministarstvu poljoprivrede, vodoprivrede i šumarstva a odnosi se na davanje podrške zahtjevu kantonalnog Javnog preduzeća Poljoprivredno dobro Butmir d.o.o. Sarajevo Ilidža za prioritetnu isplatu zaostalih poticaja za poljoprivredu na federalnom nivou za 2016. godinu.

Dževad Adžem pokrenuo je inicijativu da Predstavnički dom Parlamenta Federacije BiH donese zaključak da se - obavezuje ministar za pitanja boraca i invalida odbrambeno-oslobodilačkog rata da zaključno sa 31.07.2017. godine, a po mogućnosti i ranije, u parlamentarnu proceduru uputi zakon o izmjenama i dopunama Zakona o provođenju kontrole zakonitosti korištenja prava iz oblasti boračko-invalidske zaštite, Zakon o izmjenama i dopunama Zakona o pravima branitelja i članova njihovih porodica, zakon o izmjenama i dopunama Zakona o posebnim pravima dobitnika najvećih ratnih priznanja i odlikovanja i članova njihovih porodica, Zakona o pravima demobiliziranih branitelja i članova njihovih porodica i zakona o izmjenama i dopunama Zakona o prijevremenom povoljnijem penzionisanju branitelja odbrambeno-oslobodilačkog rata. Smatra da Predstavnički dom ima obavezu zaključkom obavezati federalnog ministra za pitanja boraca da u što kraćem vremenskom periodu ove zakone uputi u proceduru.

Alma Krtina pitanje je postavila u vezi sa Nacrtom Zakona o izmjenama i dopunama Zakona o zdravstvenom osiguranju a održana je i javna rasprava. Traži od Federalnog ministarstva zdravstva, odnosno od kantonalnih ministarstava tačan podatak koliko je djece u

dobi od 7 do 15 godina koji ne pohađaju školu, a nalaze se na teritoriji Federacije bez zdravstvenog osiguranja, te kolika su finansijska sredstva potrebna u kantonima da se riješi ovaj problem.

Boris Barun prvo pitanje uputio je nadležnom ministarstvu i Agenciji za državnu službu Federacije BiH – koji kantoni su svojim propisima preuzeli Zakon o državnoj službi Federacije BiH, a koji kantoni su donijeli svoje zakone kojima samostalno uređuju radnopravni status državnih službenika u tijelima kantonalne uprave, te koji kantoni su takvim svojim zakonom obavljanje određenih poslova povjerali Agenciji za državnu službu Federacije BiH?

Drugo pitanje uputio je Agenciji za državnu službu Federacije BiH – koliki je ukupan broj zahtjeva za davanje prethodnog mišljenja zaprimila Agencija za državnu službu Federacije u smislu člana 33. stav 8. Zakona o državnoj službi Federacije BiH za proteklih 14 godina koliko je na snazi Zakon o državnoj službi Federacije BiH?

Sljedeće pitanje uputio je, također, Agenciji za državnu službu Federacije BiH – koliki je ukupan broj državnih službenika u tijelima državne uprave kantona, a prema registru državnih službenika i prema drugim evidencijama na koje se potencijalno može primijeniti član 33. stav 8. Zakona o državnoj službi Federacije BiH?

Amra Haračić inicijativu je uputila Ljekarskoj komori Federacije i Stomatološkoj komori Federacije, koji su u skladu sa članom 2. Zakona o zdravstvenoj zaštiti sudionici u izradi standarda i normativa zdravstvenih usluga, da predlože listu stomatoloških usluga za osobe sa invaliditetom, te sa anesteziološkim uslugama potrebnim prilikom njihovog pružanja, kao i timove koji obavljaju navedene usluge i dostave informaciju da li se ove usluge pružaju u izvanbolničkim ili bolničkim uvjetima. Traži da komore u što kraćem periodu dostave ove podatke i Federalnom ministarstvu zdravstva kako bi se moglo pristupiti izmjeni Plave knjige, a što će dovesti do ujednačavanja stomatoloških usluga.

Naredna inicijativa upućena je prema Federalnom ministarstvu kulture i sporta da se što prije pristupi izradi strategije sporta u Federaciji BiH kako bi se mogao donijeti zakon o sportu u Federaciji.

Amra Kunovac prvo pitanje uputila je Vladi Federacije BiH - da li radi na određivanju ciljeva smanjenja potrošnje energije, da li je uspostavila regulatorni, institucionalni i finansijski okvir da se uklone prepreke koje utječu na efikasnost u korištenju energije? Da li je Vlada uradila takav akcioni plan energetske efikasnosti?

Drugo pitanje – kada će se postupci nabavki započinjati i provoditi pravovremeno uz potpuno poštovanje procedura propisanih Zakonom o javnim nabavkama?

Naredno pitanje – kada će Vlada i Federalno ministarstvo finansija inicirati usvajanje Međunarodnih računovodstvenih standarda za javni sektor?

Posljednje pitanje odnosi se na izdatke za fiksne, mobilne i internet usluge na godišnjem nivou u institucijama Federacije BiH koji iznose 2.500.000 KM. Kada će Vlada Federacije BiH za svoje članove uvesti određeni iznos?

Jozo Bagarić pitanje je uputio premijeru, federalnom ministru energetike, rudarstva i industrije, DERK-u, NOS-u, kojim traži informaciju o tome šta su poduzeli u vezi sa deblokadom postupka izdavanja energetske dozvola za vjetroenergetske projekte sa prostora općina Tomislav-Grad, Livno, Kupres, odnosno Hercegbosanski kanton?

Traži od Federalnog ministarstva poljoprivrede, vodoprivrede i šumarstva da dostavi detaljan izvještaj o utrošku sredstava iz Programa poticaja za 2015. i 2016. godinu sa stavke - Ostale podrške i tekuća rezerva Federalnog ministarstva poljoprivrede, vodoprivrede i šumarstva.

Blaž Župarić tri pitanja je uputio federalnom ministru poljoprivrede, vodoprivrede i šumarstva i Agenciji za vodno područje rijeke Save – kada će doći do realizacije IPA projekta u sklopu Akcionog plana Evropske komisije oporavka od poplava 2014.-2017. godina u dijelu koji se odnosi na rekonstrukciju savskog odbrambenog nasipa na području srednje Posavine, konkretno dionica Kopaonice Vidovice? Ako realizacija od Evropske komisije nije izvjesna zbog ograničenih resursa, zašto Agencija za vodno područje rijeke Save nije započela rekonstrukciju nasipa iz vlastitih sredstava kada je poznato da se iz tih sredstava rade manje važni projekti po čitavoj Federaciji koji sigurno nisu u visokom prioritetu? Kada se

planira nastavak izgradnje crpne stanice Vidovice započete prije rata a veoma važne za odvodnju oborinskih voda u Savu a u slučaju visokog vodostaja vraćanje voda u kanalsku mrežu?

Safet Kešo postavio je pitanja u vezi sa izjavom zaposlenika Agencije za nadzor nad tržištem BiH koji je u jednoj izjavi, između ostalog, kazao da, po pravilu EU, meso starije od 12 mjeseci ide na tržište BiH. Pita - da li je tačno da je pravilo EU o kojem je govorio Samir Bekto zaista na snazi i da li se u bilo kojem eventualnom propisu, kojim se ono definira, eksplicitno navodi tržište BiH? Da li je u slučaju postojanja navedenog pravila ova ili bilo koja druga agencija, npr. Agencija za sigurnost hrane ili institucija BiH na bilo koji način reagirala na ovo?

Treće pitanje – da li je i u kojim količinama ovakvo meso uvoženo u BiH i da li je moglo završiti kod naših građana?

Četvrto pitanje - da li postojeća zakonska i podzakonska rješenja na nivou BiH osiguravaju potreban nivo sigurnosti tržišta i građana BiH, odnosno da li ta rješenja mogu efikasno preduprijeti situacije poput one koju je izjavio zaposlenik u Agenciji za nadzor nad tržištem BiH?

Peto pitanje – postoji li mogućnost da se ova uznemirujuća izjava zaposlenika zasniva na tome da “kažu” i ako postoji kako se to dozvoljava?

Uime Kluba SDA predlaže zaključak da se - zadužuje Vlada Federacije BiH da putem resornih ministarstava koja imaju isključivu ili sa kantonima Federacije BiH zajedničku ustavnu nadležnost u relevantnim oblastima djelovanja izvrši provjeru postojanja kolizija u zakonskim propisima kantonalnog i federalnog nivoa te da definira plan programskih i operativnih mjera za otklanjanje takvog stanja sa svim potrebnim elementima; o provedenim aktivnostima iz tačke 1. da Vlada Federacije BiH dostavi informaciju Predstavničkom domu Parlamenta Federacije BiH u roku 60 dana od dana njegovog usvajanja.

Slavica Josipović pitanje je uputila Federalnom ministarstvu pravde od kojeg traži da predloži deklaraciju o osudi zločina komunističkog režima na ovim prostorima od 1945. do 1990. godine kako bi je Ministarstvo uputilo prema Vladi a Vlada prema Parlamentu Federacije BiH.

Zukan Helez pitanje je uputio općinskim službama za zapošljavanje u Federaciji BiH - koliko je zaposlenih osoba u 2015., 2016. i u prva tri mjeseca 2017. godine u privrednim subjektima i koliki je broj novevidentiranih na evidenciji za nezaposlene osobe?

Jasmin Kadić pokrenuo je inicijativu prema Vladi Federacije BiH da svi direktori i uprave javnih preduzeća sa većinskim vlasništvom državnog kapitala, odnosno pod upravom Vlade a koji posluju negativno budu smjenjeni.

Naredno pitanje uputio je Elektroprivredi BiH – zašto je došlo do zastoja u izgradnji Hidroelektrane Vranduk? Da li su tačni navodi da još nije osigurana dozvola za građenje, odnosno da nije urađen glavni projekt te da postoji određeni sukob između Elektroprivrede i izvođača radova?

Pitanje je uputio prema Predstavničkom domu i domu naroda Parlamenta Federacije BiH i Federalnom ministarstvu obrazovanja - šta je sa Zakonom o bibliotečkoj djelatnosti koji je u februaru 2016. godine usvojen u formi nacрта, a čiji je predlagač Dennis Gratz? Kada se očekuje da bude u formi prijedloga?

Pitanje je uputio predsjedavajućem i članovima Interresorne grupe koja je radila na rezoluciji o borcima. Kazao je da su se boračke organizacije i predstavnici Parlamenta dogovorili da se rezolucija predloži na usvajanje, a još se nije našla na dnevnom redu. Kada se mogu očekivati rezultati Interresorne grupe?

Radoslav Luburić pitanje je uputio Vladi Federacije i Federalnom ministarstvu poljoprivrede, vodoprivrede i šumarstva - da li će osigurati sredstva u budžetu za područja koja je pogodila elementarna nepogoda za saniranje posljedica nastalih uslijed velike hladnoće?

Bajro Makić pitanje je uputio Federalnom ministarstvu finansija – traži podatke o svim isplatama u skladu sa Programom novčanih podrški u poljoprivredi i ruralnom razvoju za 2016. godinu i prvi kvartal 2017. godine. Traži podatke za svaku oblast pojedinačno na mjesečnom nivou.

Jasmina Zubić ponovila je neka pitanja na koja nije dobila odgovore. Pitanje koje je uputila na 18. redovnoj sjednici glasilo je - u kojoj fazi je realizacija zaključka Skupštine Tuzlanskog kantona kojim se traži od Vlade i Parlamenta da izvrše usklađivanje Zakona o zdravstvenom osiguranju Federacije BiH sa evropskim konvencijama, te međunarodnim ugovorima i sporazumima sa ciljem da se obaveznim zdravstvenim osiguranjem obuhvate sva djeca u Federaciji, u smislu da se djeci do 15 godina omogući pravo na bezuvjetnu zaštitu. Napomenula je da o ovom pitanju postoji preporuka Institucije ombudsmena koja do danas nije ispoštovana.

Naredno pitanje koje je uputila Vladi glasilo je – da li je realizirana inicijativa usvojena na 16. redovnoj sjednici, održaoj 24.01.2017. godine, a odnosi se na finansiranje Roditeljske kuće. Ako je odgovor pozitivan o kojem iznosu je riječ?

Naredno pitanje je, također, upućeno Vladi Federacije BiH a uputila ga je na 19. sjednici – kada će biti potpisan sporazum Saveza općina i gradova o saradnji između Parlamenta Federacije BiH, Vlade Federacije BiH i Saveza općina i gradova.

Izrazila je žaljenje što inicijativu koju je pokrenula na današnjoj sjednici zastupnici nisu usvojili. Traži od nadležne službe Parlamenta da inicijativu dostavi Vijeću ministara i Upravnom odboru Uprave za indirektno oporezivanje.

Pitanje upućuje predsjedavajućem Predstavničkog doma Parlamenta Federacije BiH Edinu Mušiću i predsjedavajućoj Doma naroda Lidiji Bradari, kao i premijeru Fadilu Novaliću i komisijama za ravnopravnost spolova oba doma Parlamenta Federacije BiH – u kojoj fazi je realizacija inicijative za uvođenje kriterija za odabir članova i članica u savjetodavna tijela i komisije na svim nivoima vlasti kada je u pitanju romska populacija, posebno poštujući jednakopravnost žena u skladu sa važećim zakonskim propisima koji garantuju jednakost žena sa svim nivoima izvršne i zakonodavne vlasti.

Naredno pitanje uputila je premijeru Vlade Federacije BiH – zašto do danas nisu usvojeni kriteriji za utvrđivanje stepena finalizacije gotovih proizvoda vezano uz prioritet kod isporuke sirovine i rokove plaćanja koje je pripremila Stručna grupa Privredne komore Federacije BiH i polovinom 2016. godine dostavila premijeru?

Pitanje je uputila Ministarstvu vanjske trgovine i ekonomskih odnosa BiH - u kojoj fazi je realizacija inicijative grupacije šumarstva i drvne industrije Privredne komore Federacije BiH, koja je upućena 03.01.2017. godine na adresu nadležnog ministarstva a kojom se inicira uvođenje taksi na izvoz trupaca i rezane građe?

Davor Vuletić pitanje je uputio predsjedavajućem Predstavničkog doma - da li je neko od predstavnika Predstavničkog doma bio pozvan i prisutan na obilježavanju zločina u Jasenovcu koje je počinila fašistička vlast NDH?

Faruk Čupina pita koliko se akata nalazi u proceduri koje su uputili ovlašteni predlagači? Pokrenuo je inicijativu da se akti koje su uputili zastupnici, bez obzira na mišljenje Vlade Federacije BiH, nađu na dnevnom redu narednih sjednica Predstavničkog doma.

Drugo pitanje postavila je Vladi Federacije BiH da li je pristupila analizi nastalih šteta na poljoprivrednim usjevima uslijed vremenskih neprilika u periodu od 16. do 24. aprila 2017. godine, te da li Vlada razmatra proglašenje stanja elementarne nepogode za prostor Federacije BiH?

Pokreće inicijativu kojom traži da se na web stranici Predstavničkog doma Parlamenta Federacije BiH učine dostupnim: zapisnici sjednica, zastupnička pitanja i inicijative, te snimci sa sjednica Doma.

Jasna Duraković-Hadžiomerović traži od Vlade da joj dostavi Odluku o osnivanju alimentacijskog fonda.

Pitanje upućuje Federalnom ministarstvu rada i socijalne politike i Federalnom ministarstvu pravde – da li je pravljena analiza ili istraživanje koje daje uvid u statistiku u vezi sa stanjem jednoroditeljskih porodica u Federaciji BiH; da li se iko bavio pitanjem grubog kršenja prava djeteta u kontekstu nemogućnosti samohranog roditelja da po rješenju naplati alimentaciju od drugog roditelja koji je obavezan platiti alimentaciju? Da li je Vlada napravila neki finansijski plan po pitanju alimentacijskog fonda?

Pokrenula je inicijativu prema ombudsmenu za ljudska prava BiH kojom traži da se izradi specijalni izvještaj o stanju jednoroditeljskih zajednica na teritoriji Federacije sa posebnim osvrtom na dostavu informacije o kršenju dječijih prava i samohranih roditelja, vezano uz isplaćivanje alimentacije.

Elvir Karajbić kazao je da je Uprava za javni dug raspisala poziv 23.02.2017. godine gdje se evidentiraju potraživanja na osnovu stare devizne štednje. U dokumentaciji koja se traži pod tačkom 5. traži se originalna potvrda da devizni štediša nije ostvario svoje pravo na osnovu devizne štednje i tu potvrdu u RS izdaje Agencija za posredničke informatičke i finansijske usluge. Traži od Federalnog ministarstva finansija da riješi ovaj problem da ovlasti određene institucije koje će davati ove potvrde kako bi naši građani iz Federacije mogli ostvariti svoja prava.

Drugo pitanje uputio je Federalnom ministarstvu za pitanja boraca i invalida odbrambeno-oslobodilačkog rata, a vezano uz Zakon o pravima branitelja i članova njihovih porodica gdje bi oni koji su oboljeli od PTSP, ako su oboljeli do 23.12.1997. godine, mogli ostvariti pravo na penziju i invalidninu a zahtjev su mogli podnijeti do 19.06.2017. godine. Pita i sugeriše ovom ministarstvu da nešto uradi po ovom pitanju, te da li će se pomaknuti rok, budući da ljudi i danas oboljevaju od PTSP i da li će izmijeniti čl. 9. i 35. Zakona.

Još je kratko naveo da je Klub zastupnika SDP-a predložio na današnjoj sjednici Prijedlog Zakona o izmjenama i dopunama Zakona o PIO, odnosno izmjene člana 137. stav 2. Onaj ko je ostvario pravo na prijevremenu penziju prema ovom zakonu pravo je mogao ostvariti do 31.12.2015. godine. Svi koji su ostvarili to pravo u 2016. i 2017. godini, njihovi zahtjevi se ne primaju u PIO zato što je istekao rok. Klub je predložio ovim izmjenama Zakona da se taj rok produži do donošenja novog zakona kako bi ljudi mogli otići u penziju.

Saša Mitrović pitanje je uputio Vladi Federacije BiH - zašto bojkotuje dolazak na sjednice Parlamenta Federacije BiH i zašto ne poštuje ovu instituciju?

Midhat Karović prvo pitanje uputio je Vladi Federacije BiH i traži da mu se dostavi informacija u Geodetskom zavodu, konkretno, šta je sa kartama u koje je poslije rata investirano mnogo novca, gdje su, ko sa njima raspolaže i kome su dostupne? Šta je sa zaposlenicima Geodetskog zavoda?

Drugo pitanje koje ponavlja više puta - da li je održana sjednica Nezavisnog odbora i Odbora za žalbe od 21.04.2017. godine?

Jusuf Bubica komentarisao je odgovore na neka pitanja koja je postavljao te smatra da Vlada daje neadekvatne i neozbiljne odgovore.

Traži od predsjedavajućeg da se ispoštuje aktuelni sat ne duže od sata.

Šemsudin Kavazović nije zadovoljan odgovorom Federalnog ministarstva za izbjegla i raseljena lica na inicijativu koju je pokrenuo a vezan je uz izgradnju mosta koji bi povezivao dva pravoslavna sela u općini Gradačac.

Prešlo se na izmjene i dopune dnevnog reda.

U raspravi o izmjenama i dopunama dnevnog reda učestvovali su: Boro Krišto, Elvir Karajbić, Ilhan Bušatlić, Zukan Helez, Jasmin Kadić i Jozo Bagarić.

Uime Kluba zastupnika SDA Ismet Osmanović tražio je pauzu 30 minuta kako bi izvršio konsultacije u vezi sa dnevnim redom.

Pauza 30 minuta.

Nastavljena je rasprava u vezi sa dnevnim redom u kojoj su učestvovali Dževad Adžem, Ilhan Bušatlić i Ismet Osmanović.

Prijedlog da se u dnevni red uvrsti tačka -Rezolucija o pravima branitelja na osnovu pojedinačnog izjašnjavanja, sa 29 glasova za, uz tri glasa protiv i uz 48 uzdržanih glasova, nije usvojen.

Rukovodstvo Doma predložilo je zaključak o kojem su se zastupnici izjašnjavali.

Sa 58 glasova za, uz sedam glasova protiv i uz osam uzdržanih glasova, usvojen je sljedeći:

Z A K L J U Č A K

Zahtjeva se od Vlade Federacije BiH, odnosno od nadležnih resornih ministarstava da intenziviraju aktivnosti na predlaganju zakona koji su definirani u Programu rada

Vlade Federacije BiH za 2017. godinu, a tiču se pitanja iz oblasti branilačko-invalidske zaštite.

Sa 54 glasa za, uz 18 glasova protiv i uz devet uzdržanih glasova, usvojen je sljedeći:

D N E V N I R E D

1. Prijedlog Programa rada Predstavničkog doma Parlamenta Federacije BiH za 2017. godinu;
2. Nacrt Zakona o liječenju neplodnosti biomedicinski potpomognutom oplodnjom;
3. Nacrt Zakona o mirnom rješavanju radnih sporova;
4. Nacrt Zakona o porezu na dohodak;
5. Nacrt Zakona o doprinosima;
6. Prijedlog Odluke o prihvatanju zaduženja po Sporazumu o zajmu između Bosne i Hercegovine i Svjetske banke - Međunarodne banke za obnovu i razvoj (IBRD) za zajam za Razvojnu politiku javnih finansija;
7. Prijedlog Odluke o prihvatanju zaduženja po Sporazumu o zajmu između Bosne i Hercegovine i Svjetske banke – Međunarodne banke za obnovu i razvoj (IBRD) za Projekt podrške zapošljavanju;
8. Provođenje odluka Ustavnog suda Federacije BiH:
 - a) Zaključak o provođenju presude Ustavnog suda FBiH broj U-9/16 od 30.11.2016.,
 - b) Zaključak o provođenju presude Ustavnog suda FBiH broj U-8/16 od 25.10.2016.,
 - c) Zaključak o provođenju presude Ustavnog suda FBiH broj U-75/14 od 09.03.2016.,
 - d) Zaključak o provođenju presude Ustavnog suda FBiH broj U-15/10 od 02.12.2015.,
 - e) Zaključak o provođenju presude Ustavnog suda FBiH broj U-27/15 od 23.03.2016.,
 - f) Zaključak o provođenju presude Ustavnog suda FBiH broj U-1/15 od 31.12.2016.,
 - g) Zaključak o provođenju presude Ustavnog suda FBiH broj U-55/14 od 03.04.2017.;
9. Usaglašavanje tekstova zakona različito usvojenih u domovima Parlamenta Federacije BiH;
10. Izbori i imenovanja.

Potpredsjedavajući Mladen Bošković nastavio je voditi sjednicu.

1. Prijedlog Programa rada Predstavničkog doma Parlamenta Federacije BiH za 2017. godinu

Prijedlog Programa rada utvrdila je Radna grupa.

U ime Radne grupe dodatno obrazloženje dala je Vesna Švancer.

U raspravi su učestvovali Dževad Adžem, Jasmina Zubić i Jasmin Kadić.

Sa 51 glasom za, uz 17 glasova protiv i uz šest uzdržanih glasova, Predstavnički dom usvojio je Prijedlog Programa rada Predstavničkog doma Parlamenta Federacije BiH.

2. Nacrt Zakona o liječenju neplodnosti biomedicinski potpomognutom oplodnjom

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dala je Snježana Bodnaruk.

U raspravi su učestvovali: Tarik Arapčić, Elvir Karajbić, Boris Barun, Ismet Osmanović, Jasmina Zubić, Faruk Ćupina, Oliver Radoš, Mira Ljubijankić, Ivan Musa, Mensud Borović, Jasna Duraković-Hadžiomerović, Ibrahim Šišić, Anela Šestić-Begović, Amra Kunovac, Alma Kratina, Dennis Gratz, Amra Haračić, Mira Grgić i Safet Kešo.

Sa 50 glasova za, uz četiri glasa protiv i uz 49 uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o liječenju neplodnosti biomedicinski potpomognutom oplodnjom te smatra da može poslužiti kao osnova za izradu Prijedloga Zakona.

Zadužuje se predlagač da provede javnu raspravu u trajanju 30 dana.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

3. Nacrt Zakona o mirnom rješavanju radnih sporova

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Vesko Drljača.

Domu se obratio i Ismet Bajramović, u ime Saveza sindikata.

U raspravi su učestvovali: Elvir Karajbić, Faruk Ćupina, Amra Haračić i Ilhan Bušatlić.

Sa 44 glasa za, uz 25 glasova protiv i uz tri uzdržana glasa, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o mirnom rješavanju radnih sporova te smatra da može poslužiti kao osnova za izradu prijedloga Zakona.

Zadužuje se predlagač da provede javnu raspravu u trajanju 60 dana.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

4. Nacrt Zakona o porezu na dohodak

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

Predstavnik Vlade Federacije BiH dao je dodatno obrazloženje.

U ime Odbora za ekonomsku i finansijsku politiku obrazlagao je Sanel Razić.

U raspravi su učestvovali: Ismet Osmanović, Dženan Đonlagić, Radoslav Luburić, Elvir Karajbić, Zana Marjanović, Rasim Omerović, Ilhan Bušatlić, Dževad Agić, Munib Jusufović i Mahir Mešalić.

Sa 44 glasa za, uz 27 glasova protiv i bez uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o porezu na dohodak te smatra da može poslužiti kao osnova za izradu prijedloga Zakona.

Zadužuje se Vlada Federacije BiH da putem Federalnog ministarstva finansija, a u saradnji sa kantonima i vanbudžetskim fondovima sačini analizu fiskalnih efekata primjene predloženog Nacrta Zakona o porezu na dohodak i Zakona o doprinosima. Na osnovu člana 34. stav 4. Zakona o principima lokalne samouprave u Federaciji BiH pribaviti mišljenje Saveza općina i gradova Federacije BiH na nacrt Zakona o porezu na dohodak i Zakona o doprinosima. U slučaju negativne fiskalne procjene po pojedine kantone, jedinice lokalne samouprave ili vanbudžetske fondove predložiti izvor sredstava za nedostajuća sredstva za kantone, jedinice lokalne samouprave i vanbudžetske fondove.

Zadužuje se predlagač da provede javnu raspravu u trajanju 60 dana.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

5. Nacrt Zakona o doprinosima

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

Predstavnik Vlade Federacije BiH dao je dodatno obrazloženje.

U raspravi su učestvovali: Radoslav Luburić, Zana Marjanović, Jasmina Zubić, Ismet Osmanović i Sanel Razić.

Sa 40 glasova za, uz 22 glasa protiv i uz jedan uzdržani glas, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o doprinosima te smatra da može poslužiti kao osnova za izradu prijedloga Zakona.

Zadužuje se Vlada Federacije BiH da putem Federalnog ministarstva finansija, a u saradnji sa kantonima i vanbudžetskim fondovima, sačini analizu fiskalnih efekata primjene predloženog Nacrta Zakona o porezu na dohodak i Zakona o doprinosima. Na osnovu člana 34. stav 4. Zakona o principima lokalne samouprave u Federaciji BiH pribavi mišljenje Saveza općina i gradova FBiH na nacрте Zakona o porezu na dohodak i Zakona o doprinosima. U slučaju negativne fiskalne procjene po pojedine kantone, jedinice lokalne samouprave ili vanbudžetske fondove predložiti izvor sredstava za nedostajuća sredstva za kantone, jedinice lokalne samouprave i vanbudžetske fondove.

Zadužuje se predlagač da provede javnu raspravu u trajanju 60 dana.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

6. Prijedlog Odluke o prihvatanju zaduženja po Sporazumu o zajmu između Bosne i Hercegovine i Svjetske banke - Međunarodne banke za obnovu i razvoj (IBRD) za zajam za Razvojnu politiku javnih finansija

Prijedlog Odluke dostavila je Vlada Federacije BiH.

Prijedlog Odluke razmatrala su nadležna radna tijela i dostavila izvještaje.

U raspravi niko nije učestvovao.

Sa 50 glasova za, uz 23 glasa protiv i bez uzdržanih glasova, usvojen je Prijedlog Odluke o prihvatanju zaduženja po Sporazumu o zajmu između Bosne i Hercegovine i Svjetske banke - Međunarodne banke za obnovu i razvoj (IBRD) za zajam za Razvojnu politiku javnih finansija.

7. Prijedlog Odluke o prihvatanju zaduženja po Sporazumu o zajmu između Bosne i Hercegovine i Svjetske banke – Međunarodne banke za obnovu i razvoj (IBRD) za Projekt podrške zapošljavanju

Prijedlog Odluke dostavila je Vlada Federacije BiH.

Prijedlog Odluke razmatrala su nadležna radna tijela i dostavila izvještaje.

U raspravi su učestvovali Dževad Adžem i Ilhan Bušatlić.

Sa 50 glasova za, uz 23 glasa protiv i uz dva uzdržana glasa, usvojen je Prijedlog Odluke o prihvatanju zaduženja po Sporazumu o zajmu između Bosne i Hercegovine i

Svjetske banke – Međunarodne banke za obnovu i razvoj (IBRD) za Projekt podrške zapošljavanju.

Potpredsjedavajući Bošković prekinuo je rad sjednice u 20.08.

* * *

NASTAVAK 20. REDOVNE SJEDNICE PREDSTAVNIČKOG DOMA PARLAMENTA FEDERACIJE BIH, održan 26.04.2017. godine

Sjednica je počela u 10.44.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Ilhan Bušatlić, Saša Mitrović, Alma Arnaut, Elma Đogić, Damir Mašić, Mujo Hasić, Enver Bijedić i Mirsad Kukić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

8. Provođenje odluka Ustavnog suda FBiH:

- a) **Zaključak o provođenju presude Ustavnog suda FBiH broj U-9/16 od 30.11.2016.**
- b) **Zaključak o provođenju presude Ustavnog suda FBiH broj U-8/16 od 25.10.2016.**
- c) **Zaključak o provođenju presude Ustavnog suda FBiH broj U-75/14 od 09.03.2016.**
- d) **Zaključak o provođenju presude Ustavnog suda FBiH broj U-15/10 od 02.12.2015.**
- e) **Zaključak o provođenju presude Ustavnog suda FBiH broj U-27/15 od 23.03.2016.**
- f) **Zaključak o provođenju presude Ustavnog suda FBiH broj U-1/15 od 31.12.2016.**
- g) **Zaključak o provođenju presude Ustavnog suda FBiH broj U-55/14 od 03.04.2017.**

- Zaključak o provođenju presude Ustavnog suda FBiH broj U-8/16 od 25.10.2016.

Ustavni sud Federacije BiH je 25.10.2016. godine donio presudu broj 8/16 kojom je utvrdio da je članom 72.a) Zakona o matičnim knjigama („Službene novine FBiH“, br. 37/12 i 80/14) povrijeđno pravo na lokalnu samoupravu Općine Maglaj. Presuda je objavljena u „Službenim novinama FBiH“, br. 96/16 od 07.12.2016. godine i dostavljena Parlamentu Federacije BiH.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

U raspravi su učestvovali: Boris Barun, Davor Vuletić, Dževad Hodžić, Nasir Beganović, Elvir Karajbić, Faruk Ćupina, Jusuf Bubica, Muhamed Ibrahimović, Dženan Đonlagić i Munib Jusufović.

Sa 68 glasova za, uz jedan glas protiv i uz četiri uzdržana glasa, usvojen je sljedeći:

Z A K L J U Č A K

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-8/16 od 25.10.2016.

- Zaključak o provođenju presude Ustavnog suda FBiH broj U-9/16 od 30.11.2016.

Ustavni sud Federacije BiH je 30.11.2016. godine donio presudu broj 9/16 kojom je utvrdio da je članom 114. Zakona o zaštiti od požara i vatrogastvu („Službene novine FBiH“, br. 64/09) i članom 106. Zakona o zaštiti od požara i vatrogastvu („Službene novine Zeničko-dobojskog kantona“, br. 5/11) povrijedno pravo na lokalnu samoupravu Općine Maglaj.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

U raspravi niko nije učestvovao.

Sa 68 glasova za, bez glasova protiv i uz tri uzdržana glasa, usvojen je sljedeći:

Z A K L J U Č A K

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-9/16 od 30.11.2016.

- Zaključak o provođenju presude Ustavnog suda FBiH broj U-15/10 od 02.12.2015.

Ustavni sud Federacije BiH je 02.12.2015. godine donio presudu broj 15/10 kojom je utvrdio da član 6. stav 1. u dijelu koji glasi: “kao i osoba koja ispunjava pretpostavke iz stava 2. ovog člana”, te čl. 27. i 73. Zakona o notarima nisu u skladu sa Ustavom FBiH.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

Sa 66 glasova za, bez glasova protiv i uz tri uzdržana glasa, usvojen je sljedeći:

Z A K L J U Č A K

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-15/10 od 02.12.2015.

- Zaključak o provođenju presude Ustavnog suda FBiH broj U-75/14 od 09.03.2016.

Ustavni sud Federacije BiH je 09.03.2016. godine donio presudu broj 75/14 kojom je utvrdio da član 56. Zakona o Javnom servisu RTVFBiH (“Službene novine FBiH”, br. 48/08) nije u saglasnosti sa Ustavom Federacije BiH.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

Sa 69 glasova za, bez glasova protiv i uz tri uzdržana glasa, usvojen je sljedeći:

ZAKLJUČAK

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-75/14 od 09.03.2016.

- Zaključak o provođenju presude Ustavnog suda FBiH broj U-27/15 od 23.03.2016.

Ustavni sud Federacije BiH je 23.03.2016. godine donio presudu broj 27/15 kojom je utvrdio da čl. 33. i 40. Zakona o stečajnom postupku ("Službene novine FBiH", br. 29/03, 32/04 i 42/06) nisu u saglasnosti sa Ustavom Federacije BiH.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

U raspravi je učestvovao Mahir Mešalić.

Sa 65 glasova za, uz tri glasa protiv i uz četiri uzdržana glasa, usvojen je sljedeći:

ZAKLJUČAK

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-27/15 od 23.03.2016.

- Zaključak o provođenju presude Ustavnog suda FBiH broj U-1/15 od 31.12.2016.

Ustavni sud Federacije BiH je 13.12.2016. godine donio presudu broj 1/15 kojom je utvrdio da član 37. i član 44. st. 1. i 3. Zakona o inspekcijama ("Službene novine FBiH", br. 73/14) nisu u skladu sa Ustavom Federacije BiH.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

Sa 62 glasa za, bez glasova protiv i uz dva uzdržana glasa, usvojen je sljedeći:

ZAKLJUČAK

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-1/15 od 13.12.2016.

- Zaključak o provođenju presude Ustavnog suda FBiH broj U-55/14 od 07.10.2015.

Ustavni sud Federacije BiH je 07.10.2015. godine donio presudu broj 55/14 kojom je utvrdio da član 68., član 73. st. 2. i 3. i član 76. st. 3. i 4. Zakona o električnoj energiji ("Službene novine FBiH", br. 66/13) povređuju pravo na lokalnu samoupravu Općine Novo Sarajevo i Općine Konjic.

U skladu sa članom 247. Poslovnika Predstavničkog doma presuda je upućena zastupnicima i nadležnim radnim tijelima.

Sa 63 glasa za, uz četiri glasa protiv i uz osam uzdržanih glasova, usvojen je sljedeći:

ZAKLJUČAK

Zadužuje se premijer Federacije BiH da u skladu sa obavezama Ustava Federacije BiH osigura izvršenje presude Ustavnog suda Federacije BiH broj U-55/14 od 07.10.2015.

Za tačke 9. i 10. - **Usaglašavanje tekstova zakona različito usvojenih u domovima Parlamenta Federacije BiH i Izbori i imenovanja** - nije bilo materijala.

Predsjedavajući je zaključio rad 19. redovne sjednice u 11.36.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić